

Izjava: Visoki predstavnik podstiče na promjene u poslovnom okruženju u BiH i viznom režimu za EU u cilju unapređenja konkurentnosti i stvaranja radnih mjesta

“Bosna i Hercegovina se vratila na globalno tehnološko tržište”, danas je u Hanoveru izjavio novinarima visoki predstavnik Christian Schwarz-Schilling. On je također rekao da učešće delegacije BiH po prvi put na najvećem svjetskom kompjuterskom sajmu, CEBIT-u, predstavlja važan inicijalni korak u unapređenju odnosa između IT sektora u BiH i potencijalnih međunarodnih partnera, kao i u mijenjanju negativne percepcije o BiH koja i dalje odvraća prijeko potrebne investicije.

“BiH je i prije rata imala razvijen sektor visoke tehnologije, i njen povratak na ovo međunarodno tržište je značajan trenutak koji je veoma važan za BiH, za CEBIT i za svjetsko tržište”, rekao je visoki predstavnik.

Međutim, on je naglasio da postojeći vizni režim veoma otežava poslovanje preduzećima u BiH koja pokušavaju da osiguraju ugovore izvan zemlje. “Neshvatljivo je da poslovni ljudi i inženjeri moraju, na primjer, prolaziti kroz težak i dugotrajan proces dobijanja vize kada moraju poslati softverskog inženjera da otkloni neki problem koji klijent ima. Preduzeća ne mogu odmah uputiti inženjera. Na ovaj način, ni jedna zemlja ne može istinski biti konkurentna u Evropi.

Visoki predstavnik je rekao da će o ovom pitanju razgovarati

sa ministrima EU.

Jedan od prijedloga proisteklih iz ove posjete bio je da preduzeća iz sektora IT u BiH, oko 300 uglavnom malih i srednjih preduzeća, koja su skoro sva u privatnom vlasništvu, osnuju udruženje za lobiranje kod organa za vršenje administrativnih reformi koje će olakšati njihovo širenje i stvaranje novih radnih mjesta.

Visoki predstvnik je izrazio nadu da će preduzeća realizirati ovu inicijativu.

“Moj najviši prioritet je da pokušam podstaći ekonomski rast”, rekao je on. “Situacija sa ovolikom stopom nezaposlenosti, posebno među omladinom, je neodrživa. To se mora mijenjati, i postoji značajan prostor za rast u sektoru visoke tehnologije”.